

REGLUGERÐ

um vaxtabréfalán Iðnlánasjóðs.

1. gr.

Iðnlánasjóði er heimilt að gefa út sérstakan flokk vaxtabréfa í þeim tilgangi að breyta í föst lán lausaskuldum starfandi iðnfyrirtækja, sem hafa ekki fengið viðunandi lán til langs tíma til framkvæmda, sem þau hafa ráðizt í fram til árs-loka 1963, enda séu lausaskuldir þessar umfram eðlileg rekstrarlán, miðað við veltufjármuni fyrirtækisins. Þessara lána njóta aðeins þau fyrirtæki, sem skylt er að greiða Iðnlánasjóðsgjald samkvæmt ákvæðum laga nr. 45 3. apríl 1963.

Ráðherra ákveður heildarfjárhæð vaxtabréfanna. Fjárhæðir einstakra bréfa skulu vera kr. 5 000.00 og kr. 100 000.00 og skal hvor deild hafa sérstakt bók-stafseinkenni en hvert bréf tölusett. Vaxtabréf, sem ganga til banka vegna inn-lausnar lausaskulda við þá, mega vera sérstaklega útgefin með öðrum fjárhæðum, en teljast þó með í heildarfjárhæð vaxtabréfa. Slík bréf má einnig gefa út á nafn viðkomandi banka, ef hann óskar, með rétti fyrir hann til að skipta bréfum í aðrar bréfastærðir og handhafabréf, ef hann óskar. Vaxtabréfin skulu undanþegin stimpilgjaldi.

Vaxtabréfalánið endurgreiðist á sambærilegum tíma og föstu lánin, sjá 4. gr.

2. gr.

Til tryggingar vaxtabréfum þessum er:

- a) sjálfskuldarábyrgð Iðnlánasjóðs,
- b) einföld ábyrgð rikissjóðs.

Ef taka þarf til trygginganna, skal það gert í þeirri röð, sem að framan greinir.

3. gr.

Vextir af vaxtabréfum Iðnlánasjóðs skulu ákveðnir af stjórn hans, að fengnu áliti Seðlabanka Íslands og með samþykki iðnaðarmálaráðherra. Greiðast vextir eftir á fyrir eitt ár í senn. Heimilt er að áskilja í vaxtabréfum hreyfanlega vexti, eftir því sem vextir breytast almennt.

4. gr.

Endurgreiðslum lána með vöxtum skal varið til innlausnar vaxtabréfum eftir útdrætti, sem notarius publicus framkvæmir. Skal semja endurgreiðsluáætlun í lok lánveitinga og útdráttur vaxtabréfa ákveðinn í samræmi við hana. Þegar útdráttur hefur farið fram, skal auglýsa í Lögbirtingablaðinu með 6 mánaða fyrirvara númer útdreginna vaxtabréfa. Innlausn fer fram við Iðnaðarbanka Íslands hf.

Gjaldldagi útdreginna bréfa og vaxtamiða skal vera árlega og miðast við, að hann sé um 3 mánuðum eftir aðalgjaldldaga lána.

5. gr.

Lán til iðnfyrirtækja, samkvæmt reglugerð þessari, skulu aðeins veitt gegn veði í fasteignum iðnfyrirtækja ásamt tilheyrandi vélum og tækjum.

Lánsfjárhæðin má eigi vera hærri en svo, að hún ásamt eftirstöðvum skulda, sem á undan hvíla á eign, fari fram úr 60% af matsverði veðsins.

Lengd lána verði meðallánstími, sem ákveðst með hliðsjón af aldri og verð-mætishlutfalli bygginga og véla í veðunum. Hámarkslánstími til bygginga sé 15 ár en til véla 7 ár.

Ársvextir skulu ákveðast á sama hátt og segir í 3. gr. Auk vaxta greiða lántakar $\frac{1}{2}\%$ árlegt kostnaðartillag til varasjóðs Iðnlánasjóðs. Dráttarvextir verði eins og þeir eru ákveðnir hæstir af Seðlabanka Íslands fyrir sambærileg lán.

Lánin eru greidd út í vaxtabréfum, sbr. 1. gr., og ganga til greiðslu umræddra lausaskulda, samkvæmt samkomulagi, sem Iðnlánasjóður gerir fyrirfram við hlutað-eigandi lánsstofnun.

6. gr.

Umsóknir um lán skulu sendar Iðnlánasjóði, ásamt eftirfarandi gögnum:

- a) Eignar- og veðbókarvottorði,
- b) váttryggingaskirteini eða óyggjandi vottorði um váttryggingu eigna fyrirtækisins,
- c) vottfestum upplýsingum um það, hverjum sé heimilt að skuldbinda fyrirtækið og veðsetja eignir þess,
- d) rekstrar- og efnahagsreikningi fyrirtækisins s. l. 2 ár,
- e) öðrum upplýsingum um rekstur og efnahag fyrirtækisins, sem óskað kann að verða eftir.

7. gr.

Áður en lán er veitt, skal fara fram nýtt mat eigna þeirra, sem boðnar eru fram til veðs. Skulu þær metnar til endurkaupsverðs að frádregnum afskriftum, er miðist við rýrnun eignarinnar frá því að hún varð til. Einnig skal við ákvörðun matsfjárhæðar taka tillit til tæknilegs notagildis eignarinnar, t. d. hvort hún fullnægi nútímakröfum varðandi afkastagetu, rekstrarhagkvæmni o. fl. Stjórn Iðnlánasjóðs skal semja nákvæmar reglur um framkvæmd matsins, er staðfestar skulu af iðnaðarmálaráðherra, að fengnu álitni Seðlabanka Íslands.

8. gr.

Matsnefnd skal meta eignir þær, sem í ráði er að veðsetja Iðnlánasjóði.

Matsnefndin skal skipuð þremur mönnum, einum tilnefndum af stjórn Iðnlánasjóðs, sem er formaður hennar, einum af Iðnaðarmálaráðuneytinu og einum af Seðlabanka Íslands vegna Ríkisábyrgðasjóðs.

Matsnefndin getur með samþykki stjórnar Iðnlánasjóðs skipað skoðunarmenn til þess að meta eignir á sínum vegum, enda skal hún endurskoða matið og staðfesta það.

Matsnefndin setur skoðunarmönnum starfsreglur.

Þóknun vegna matsstarfa ákveður stjórn Iðnlánasjóðs.

Lántaki greiðir matskostnað.

9. gr.

Að öðru leyti gilda ákvæði laga nr. 45 3. apríl 1963, um Iðnlánasjóð.

Reglugerð þessi er sett samkvæmt lögum um breytingu á lausaskuldum iðnaðarins í föst lán nr. 36 15. maí 1964, sbr. lög um breyting á þeim lögum, nr. 24 8. maí 1965.

Iðnaðarmálaráðuneytið, 10. maí 1965.

Jóhann Hafstein.

Brynjólfur Ingólfsson.